

四庫全書

集部

欽定四庫全書

樂府詩集卷八十

宋 郭茂倩 輯

近代曲辭

蓋羅縫二首

秦時明月漢時關萬里征人尚未還但願龍庭神

一作飛

將在不教胡馬渡陰山

音書杜絕白狼西桃李無顏黃鳥啼寒雁春深歸去盡

出門腸斷草萋萋

雙帶子

私言切語誰人會
海鷺雙飛繞畫梁
君學秋胡不相識
妾亦無心去採桑

崑崙子

揚子譚經去淮王
載酒過醉來啼鳥
緩一作換坐久落花多

被楔曲三首

王子年拾遺記曰周昭王溺於江漢二女
延娟延娛與王乘舟夾擁王身同沒焉故
江漢之人到今思之至春上巳之日禊集
祠間或以時鮮甘味採蘭杜色裹以沉水
中或結五色紗囊盛食或用金鐵之器並
沉水中言蛟龍畏五色金鐵則不侵此食
也後漢書禮儀志曰三月上巳官民皆絜
於東流水上曰洗濯祓除去宿垢疢為大

絜絜者言陽氣布暢萬物託出始絜之矣
注謂之禊也風俗通曰周禮女巫掌歲時
以祓除疾病禊者絜也春者蠢也蠢搖動
也尚書以殷仲春厥民析言人解析也蔡
邕曰論語莫春者春服既成冠者五六人
童子六七十人浴乎沂風乎舞雩詠而歸今
三月上巳祓禊於水濱蓋出於此一說云
後漢有郭虞者三日上巳產二女二日中

並不育俗以為大忌至此月日諱止家皆
於東流水上為祈禳自絜濯謂之禊祠引
流行觴遂成曲水韓詩曰鄭國之俗三月
上巳之溱洧兩水之上招魂續魄秉蘭草
祓除不祥漢書八月祓灊水亦斯義也杜
薦祓禊賦曰王侯公主暨于富商用事伊
雒帷幔玄黃本傳大將軍梁商亦歌泣於
雄禊也自魏不復用三日水宴者焉晉書

曰武帝嘗問摯虞三日曲水之義虞對曰
漢章帝時平原徐肇以三月初生三女至
三日俱亡人以為怪乃招攜之水濱洗祓
遂因水以汎觴其義起此東哲曰昔周公
城洛邑因流水以汎酒故逸詩云羽隨波
又秦昭王以三日置酒河曲見金人奉水
心之劍曰令君制有西夏乃霸諸侯因此
立為曲水二漢相緣皆為盛集西京雜記

日漢宮三月上巳張樂於流水是也晉宋
已後皆因之至唐傳以為曲

昨見春條綠那知秋葉黃蟬聲猶未斷寒一作寒雁已成

行

金谷園中柳春色已一作自舞腰那堪好風景獨上洛陽

橋

何處堪愁思花間長樂宮君王不重客泣淚向春一作東

風

上巳樂

張祜

猩猩血絲擊頭標天上齊聲舉畫橈卻是內人爭意切
六宮羅袖一時招

穆護砂

歷代歌辭曰穆護砂曲犯角

玉管朝朝弄清歌日日新折花當驛路寄與隴頭人

思歸樂二首

樂苑曰思歸樂商調曲也後一曲犯角

晚日催弦管春風入綺羅杏花如有意偏落舞衫多
萬里春應盡三江雁亦稀連天漢水廣孤客未言歸

金殿樂

入夜秋砧動千門起四隣不緣樓上月應為隴頭人

胡渭州二首

樂苑曰胡渭州商調曲也

亭亭孤月照行舟寂寂長江萬里流鄉國不知何處是
雲山漫漫使人愁

楊柳千尋色桃花一苑芳風吹入簾裏唯有惹衣香

戎渾

風勁角弓鳴將軍獵渭城草枯鷹眼疾雪盡馬蹄輕

牆頭花二首

蟋蟀鳴洞房梧桐落金井為君裁舞衣天寒剪刀冷
妾有羅衣裳秦王在時作為舞春風多秋來不堪著

採桑

樂苑曰採桑羽調曲又有楊下採桑按採

桑本清商西曲也

自古多征戰由來尚甲兵長驅千里去一舉兩蕃平按
劍從沙漠歌謠滿帝京寄言天下將須立武功名

楊下採桑

飛絲惹綠塵軟葉對孤輪今朝入園去物色彊看人

破陣樂

歷代歌辭曰破陣樂小歌曲樂苑曰商調
曲也按破陣樂本舞曲唐太宗所造玄宗

又作小破陣樂亦舞曲也

秋來四面足風沙塞外征人暫別家千里不辭行路遠
時光早晚到天涯

同前二首

張說

漢兵出頓金微照日明光鐵衣百里火幡焰焰千行雲
騎駢駢蹙踏遼河自竭鼓噪燕山可飛正屬四方朝賀
端知萬舞皇威

少年膽氣凌雲笑許驍雄出羣匹馬城南挑戰單刀薊

北從軍一鼓鮮卑送款五餌單于解紛誓欲成名報國
羞將開口論勲

戰勝樂

百戰得名天兵意氣生三邊永不戰此是我皇英

劍南臣

不分君恩斷觀妝視鏡中容華尚春日嬌愛已秋風枕
席臨窗曉屏帷對月空年年後庭樹芳悴在深宮

征步郎

塞外虜塵飛頻年度磧西死生隨玉劒辛苦向金微

歎疆場

樂苑曰歎疆場宮調曲也

聞道行人至妝梳對鏡臺淚痕猶尚在笑靨自然開

塞姑

昨日虜梅塞口整見諸人鎮守都護三年不歸折盡江
邊楊柳

水鼓子

彫弓白羽獵初回
薄夜牛羊復下來
夢水河邊秋草合
黑山峰外陣雲開

婆羅門

樂苑曰婆羅門商調曲
開元中西涼府節度楊敬述進唐會要曰天寶十三載改婆羅門為霓裳羽衣

迴樂峰前沙似雪
受降城外月如霜
不知何處吹蘆管
一夜征人盡望鄉

浣沙女二首

南陌春風早東鄰去日斜
千花開瑞錦香撲美人車
長樂青門外宜春小苑東
樓開萬戶上人向百花中

鎮西二首

天邊物色更無春祇有羊羣與馬羣
誰家營裏吹羌笛
哀怨教人不忍聞

歲去年來拜聖朝更無山闕對溪橋
九門楊柳渾無半
猶自千條與萬條

回紇

樂苑曰回紇商調曲也

曾聞瀚海使難通幽閨少婦罷裁縫緬想邊庭征戰苦
誰能對鏡治愁容久戍人將老須臾變作白頭翁

長命女

樂苑曰長命西河女羽調曲也樂府雜錄
曰大歷中嘗有樂工自造一曲即古曲長
命西河女也增損節奏頗有新聲

雲送關西雨風傳渭北秋孤燈然客夢寒杵搗鄉愁

醉公子

昨日春園飲人朝倒接離誰人扶上馬不省下樓時

一片子

柳色青山映梨花雪鳥藏綠窗桃李下閑坐歎春芳

甘州

樂苑曰甘州羽調曲也

欲使傳消息空書意不任寄君明月鏡偏照故人心

濮陽女

樂苑曰濮陽女羽調曲也

雁來書不至月照獨眠房賤妾多愁思不堪秋夜長

相府蓮

古解題曰相府蓮者王儉為南齊相一時
所辟皆才名之士時人以入儉府為蓮花
池謂如紅蓮映綠水今號蓮幕者自儉始
其後語訛為想夫憐亦名之醜爾又有簇

拍相府蓮樂苑曰想夫憐羽調曲也白居易詩曰玉管朱弦莫急催客聽歌送十分杯長愛夫憐第二句倩君重唱夕陽開王維右丞詞云秦川一半夕陽開是也

夜聞鄰婦泣切切有餘哀即問緣何事征人戰未

一作骨

迴

簇拍相府蓮

莫以今時寵寧無舊日恩看花滿眼淚不笑楚王言閨

燭無人影羅屏有夢魂近來音耗絕終日望應門

離別難

樂府雜錄曰離別難武后朝有一士人陷
冤獄籍其家妻配入掖庭善吹簫栗乃撰
此曲以寄情焉初名大郎神蓋取良人第
行也既畏人知遂三易其名曰悲切子終
號怨回鵲云

此別難重陳花深復變人來時梅覆雪去日柳含春物

候催行客歸途淑氣新
剡川今已遠魂夢暗相親

同前

白居易

綠楊陌上送行人
馬去車回一望塵
不覺別時紅淚盡
歸來無淚可霑巾

山鷓鴣二首

歷代歌辭曰山鷓鴣羽調曲也

玉關征戍久空閨
人獨愁寒露溼青苔
別來蓬鬢秋
人坐青樓晚鶯語
百花時愁多人自老
腸斷君不知

鷓鴣詞

李益

湘江斑竹枝，錦翼鷓鴣飛。
處處湘陰合，即從何處歸。

同前二首

李涉

湘江煙水深沙岸，隔楓林何處鷓鴣飛。
日斜斑竹陰，二女虛垂淚。
三閭枉自沉，惟有鷓鴣啼。
獨傷行客心。

越岡連越井，越鳥更南飛。
何處鷓鴣啼，夕煙東嶺歸。
嶺頭行人少，天涯北客稀。
鷓鴣啼別處，相對淚沾衣。

樂世

白居易

一曰綠腰琵琶錄曰綠腰即錄要也貞元
中樂工進曲德宗令錄出要者因以為名
後語訛為綠腰唐新書曰涼州胡渭錄要
雜曲是也樂府雜錄曰綠腰軟舞曲也康
崑崙嘗於琵琶彈一曲即新翻羽調綠腰
也樂苑曰樂世羽調曲又有急樂也

管急絲繁拍漸稠綠腰宛轉曲終頭誠知樂世聲聲樂
老病人聽未免愁

急世樂

白居易

正抽碧線繡紅羅
忽聽黃鶯歛翠蛾
秋思冬愁春恨望
大都不得意時多

何滿子

白居易

唐白居易曰何滿子開元中滄洲歌者臨
刑進此曲以贖死竟不得免杜陽雜編曰
文宗時宮人沈阿翹為帝舞何滿子調斷
風態率皆宛暢然則亦舞曲也

世傳滿子是人名臨就刑時曲始成一曲四調歌八疊
從頭便是斷腸聲

同前

薛逢

繫馬宮槐老持杯店菊黃故交今不見流恨滿川光

清平調三首

李白

松窗錄曰開元中禁中重木芍藥會花方
繁開帝乘照夜白太真妃以步輦從李龜
年以歌擅一時之名帝曰賞名花對妃子

馬用舊樂辭為遂命李白作清平調辭三
章令梨園弟子略撫絲竹以促歌帝自調
玉笛以倚曲唐書曰玄宗嘗自度曲欲造
樂府新辭亟召白白已醉卧於酒肆召入
以水灑面即令秉筆頃之成十數章是也
雲想衣裳花想容春風拂檻露華濃若非羣玉山頭見
會向瑤臺月下逢

一枝紅艷露凝香雲雨巫山枉斷腸借問漢宮誰得似

可憐飛鷺倚新妝

名花傾國兩相歡
長得君王帶笑看
解釋春風無限恨
沈香亭北倚闌干

回波樂

李景伯

回波樂商調曲唐中宗時造蓋出於西水
引流泛觴也本事詩曰中宗之世嘗因內
宴羣臣皆歌回波樂換辭起舞時沈佺期
以罪流嶺表恩還舊官而未復朱紱餘期

乃歌回波樂辭以見意中宗即以緋魚賜之自是多求遷擢唐書曰景龍中中宗宴侍臣酒酣令各為回波樂衆皆為諂佞之辭及自要榮位次至諫議大夫李景伯乃歌此辭後亦為舞曲

回波爾時酒卮微臣職在箴規侍宴既過三爵諠譁竊恐非儀

聖明樂三首

樂苑曰聖明樂開元中太常樂工馬順兒
造又有大聖明樂並商調曲也隋書樂志
曰文帝開皇六年高昌獻聖明樂曲帝令
知音者於館所聽之歸而肄習及客方獻
先於前奏之胡夷皆驚焉然則隋已有之
矣

玉帛殊方至歌鍾比屋聞華夷今一貫同賀聖明君
海浪恬丹徼邊塵靖黑山從今萬里外不復鎮蕭關

九陌祥煙合，千春瑞月明。
宮華將苑柳，先發鳳凰城。

大酺樂

樂苑曰：大酺，樂商調曲，唐張文收造。

淚滴珠難盡，容殘玉易銷。
倘隨明月去，莫道夢魂遙。

同前二首

杜審言

聖后乘乾日，皇明御歷辰。
紫宮初啟坐，蒼壁正臨春。
雷

雨垂膏澤，金錢賜下人。
詔酺歡一作欣，賞徧交泰觀。
惟新

毗陵震澤九州通，士女歡娛萬國同。
伐鼓撞鐘驚海上，

金匱要略卷八十一
新妝祓服照江東
梅花落處疑殘雪
柳葉開時任好風
大德不官逢道泰
天長地久屬年豐

同前

張祜

車駕東來值太平
大酺三日洛陽城
小兒一伎竿頭絕
天下傳呼萬歲聲

紫陌酺歸日欲斜
紅塵開路薛王家
雙鬟前說樓前鼓
兩伎爭輪好結花

千秋樂

張祜

唐書曰開元十七年八月癸亥玄宗以降
誕日讌百僚於花萼樓下百僚表請以每
年八月五日為千秋節王公已下獻鏡及
承露囊天下請咸令讌樂仍著于令從之
千秋樂蓋起於此

八月平時花萼樓萬方同樂奏千秋傾城人看長竿出
一伎初成趙解愁

火鳳辭

李百藥

樂苑曰火鳳羽調曲也又真真火鳳唐會
要曰貞觀中有裴神符者妙解琵琶初唯
作勝蠻奴火鳳傾杯樂三曲聲度清美太
宗深愛之則火鳳蓋貞觀已前曲也

歌聲扇裏出妝影扇中輕未能令掩笑何處欲聞聲知
音自不惑得念是分明莫見雙嚙歛疑人含笑情
佳人靚晚妝清唱動蘭房影入含風扇聲飛照日梁嬌
嚙香際歛逸韻口中香自有橫陳分應憐秋夜長

熱戲樂

張祐

教坊記曰玄宗在藩邸有散樂一部及即位且羈縻之嘗於九曲閱太常樂卿姜晦押樂以進凡戲輒分兩朋以判優劣人心競勇謂之熱戲乃詔寧王主藩邸樂以敵之一伎戴百尺幢鼓舞而進太常所戴則百餘尺比彼伎一曲則往復矣長欲半之疾乃兼倍太常羣樂方鼓譟上不說命內

養五六十人各執一物皆鐵馬鞭骨槌之
屬也潛匿袖中雜立於聲兒後候復鼓譟
當亂搖之左右初怪內養磨至竊見袖中
有物皆奪氣喪魄而戴竿者方振搖其幢
南北不已上顧謂內人曰其竿即當自折
斯須中斷上撫掌大笑內伎咸稱慶於是
罷遣

熱戲爭心劇火燒銅槌暗執不相饒上皇失喜寧王笑

百尺幢竿果動搖

春鶯轉

張祐

樂苑曰大春鶯轉唐虞世南及蔡亮作又
有小春鶯轉並商調曲也教坊記曰高宗
晚聲律聞風葉鳥聲皆蹈以應節嘗晨坐
聞鶯聲命樂工白明達寫之為春鶯轉後
亦為舞曲二說不同未知孰是

興慶池南柳未開太真先把一枝梅內人已唱春鶯轉

花下傚傚軟舞來

達磨支

溫庭筠

唐會要曰天寶十三載改達磨支為泛蘭
叢樂苑曰泛蘭叢羽調曲又有急泛蘭叢
樂府雜錄曰達磨支健舞曲也

擣麝成塵香不滅
砌蓮作寸絲
難絕紅淚文姬洛水春
白頭蘇武天山雪
君不見無愁高緯花
漫漫漳浦宴餘
清露寒一旦
臣僚笑因虜欲吹羌管
先沈瀾舊臣頭鬢

霜華

一作雪

早可惜雄心醉中老萬古春歸夢不歸鄴城

風雨連天草

如意娘

樂苑曰如意娘商調曲唐則天皇后所作也

看朱成碧思紛紛憔悴支離為憶君不信比來長下淚
開箱驗取石榴裙

雨霖鈴

張祜

明皇別錄曰帝幸蜀南入斜谷屬霖雨彌旬於棧道雨中聞鈴聲與山相應帝既悼念貴妃因採其聲為雨霖鈴曲以寄恨焉時獨梨園善感樂工張徽從至蜀帝以其曲授之洎至德中復幸華清宮從官嬪御皆非舊人帝於望京樓命張徽奏雨霖鈴曲不覺悽愴流涕其曲後入法部樂府雜錄曰明皇自蜀反正樂工製還京樂雨

霖鈴二曲

雨霖鈴夜卻歸秦猶是張徽一曲新長說上皇垂淚教
月明南內更無人

桂華曲

白居易

桂華曲白居易蘇州所作蘇之東城古曲
都城也今為樵牧場有桂一株生於城下
惜其不得地而作曲音韻怨切聽輒動人
故其詩云桂華詞苦意丁寧唱到嫦娥醉

便醒此是世間腸斷曲莫教不得意人聽
又聽都子歌云都子新歌有性靈一聲格
轉已堪聽更聽唱到嫦娥字猶有樊家舊
典刑

可憐天上桂花孤試問姮娥更要無月宮幸有閒田地
何不中央種兩株


渭城曲

王維

渭城一曰陽關王維之所作也本送人使

安西詩後遂被於歌劉禹錫與歌者詩云
舊人唯有何戡在更與慙慙唱渭城白居易
易對酒詩云相逢且莫推辭醉聽唱陽關
第四聲陽關第四聲即勸君更盡一杯酒
西出陽關無故人也渭城陽關之名蓋因
辭云

渭城朝雨浥輕塵客舍青青柳色春勸君更盡一杯酒
西出陽關無故人



樂府詩集卷八十

欽定四庫全書

集部

樂府詩集卷八十三

詳校官庶吉士臣柳邁祖

助教臣常循覆勘

總校官知縣臣繆琪

校對官編修臣秦瀛

謄錄監生臣孫承基

欽定四庫全書

樂府詩集卷八十一

宋 郭茂倩 輯

近代曲辭

竹枝

顧况

竹枝本出於巴渝唐貞元中劉禹錫在沅
湘以俚歌鄙陋乃依騷人九歌作竹枝新
辭九章教里中兒歌之由是盛於貞元元

和之間禹錫曰竹枝已歛也巴兒聯歌吹
短笛擊鼓以赴節歌者揚袂睢舞其音協
黃鍾羽末如吳聲含思宛轉有淇濮之豔
焉

帝子蒼梧不復歸洞庭葉下荆雲飛巴人夜唱竹枝後
腸斷曉猿聲漸稀

同前九首

劉禹錫

白帝城頭春草生白鹽山下蜀江清南人上來歌一曲

北人莫上動鄉情

山桃紅花滿上頭蜀江春水拍江

一作拍山

流花紅易衰似

郎意水流無限似儂愁

江上朱樓新雨晴
瀼西春水穀文生
橋東橋西好楊柳
人來人去唱歌行

日出三竿春霧消
江頭蜀客駐蘭橈
憑寄狂夫書一紙
住在成都萬里橋

兩岸山花似雪開
家家春酒滿盈盃
昭君坊中多女伴

永安宮外踏青來

瞿塘嘈嘈十二灘此中道路古來難
長恨人心不如水等閒平地起波瀾

巫峽蒼蒼烟雨時清猿啼在最高枝
箇裏愁人腸自斷由來不是此聲悲

城西門前滌瀕堆年年波浪不能推
懊惱人心不如石少時東去復西來

山上層層桃李花雲間烟火是人家
銀釧金釵來負水

長刀短笠去燒畬

同前二首

劉禹錫

楊柳青青江水平
聞郎江上唱歌聲
東邊日出西邊雨
道是無情還有情

一作晴

楚水巴山江雨多
巴人能唱本鄉歌
今朝北客思歸去
迴入紇那披綠羅

同前四首

白居易

瞿塘峽口冷烟低
白帝城頭月向西
唱到竹枝聲咽處

寒猿晴鳥一時啼

竹枝苦怨怨何人
夜靜山空歇又聞
蠻兒巴女齊聲唱
愁殺江樓病使君

巴東船舫上巴西
波面風生雨脚齊
水蓼冷花紅簇簇
江離溼葉碧萋萋

江畔誰人唱竹枝
前聲斷咽後聲遲
怪來調苦緣詞苦
多是通州司馬詩

同前四首

李涉

荊門灘急水潺潺兩岸猿啼烟滿山渡頭年少應官去
月落西陵望不還

巫峽雲開神女祠綠潭紅樹影參差下牢戍口初相問
無義灘頭剝別離

石壁千重樹萬重白雲斜掩碧芙蓉昭君溪上年年月
獨自嬋娟色最濃

十二峰頭月欲低空濛江上子規啼孤舟一夜東歸客
泣向春風憶建溪

同前二首

孫光憲

門前春水白蘋花岸上無人小艇斜
商女經過江欲暮
散拋殘食飼神鴉

亂繩千結絆人深
越羅萬丈表長尋
楊柳在身垂意緒
藕花落盡見蓮心

楊柳枝二首

白居易

楊柳枝白居易洛中所製也本事詩曰白
尚書有妓樊素善歌小蠻善舞嘗為詩曰

櫻桃樊素口楊柳小蠻腰年既高邁而小
蠻方豐豔乃作楊柳枝辭以託意曰永豐
西角荒園裏盡日無人屬阿誰及宣宗朝
國樂唱是辭帝問誰辭永豐在何處左右
具以對時永豐坊西南角園中有垂柳一
株柔條極茂因東使命取兩枝植於禁中
居易感上知名且好尚風雅又作辭一章
云定知玄象今春後柳宿光中添兩星河

南盧尹時亦繼和辭能曰楊柳枝者古題
所謂折楊柳也乾符五年能為許州刺史
飲酣令部妓少女作楊柳枝健舞復賦其
辭為楊柳枝新聲云

一樹春風萬萬枝嫩於金色軟於絲永豐西角荒園裏
盡日無人屬阿誰

一樹衰殘委泥土雙枝榮耀植天庭定知玄象今春後
柳宿光中添兩星

同前八首

白居易

六么水調家家唱
白雪梅花處處吹
古歌舊曲君休一
聽取新翻楊柳枝

陶令門前四五樹
亞夫營裏百千條
何似東都正二月
黃金枝映洛陽橋

依依嫋嫋復青青
勾引清風無限情
白雪花繁空撲地
綠絲條弱不勝鶯

紅板江橋青酒旗
館娃宮暖日斜時
可憐雨歇東風定

萬樹千條各自垂

蘇州楊柳任君誇更有錢塘勝館娃若解多情尋小小
綠楊深處是蘇家

蘇家小女舊知名楊柳風前別有情剝條盤作銀環樣
卷葉吹為玉笛聲

葉含濃露如啼眼枝嫋輕風似舞腰小樹不禁攀折苦
乞君留取兩三條

人言柳葉似愁眉更有愁腸似柳絲柳絲挽斷腸牽斷

彼此應無續得期

同前

盧貞

一樹依依在永豐
兩枝飛去杳無蹤
玉皇曾採人間曲
應逐歌聲入九重

同前九首

劉禹錫

塞北梅花羗笛吹
淮南桂樹小山詞
請君莫奏前朝曲
聽唱新翻楊柳枝

南陌東城春早時
相逢何處不依依
桃紅李白皆誇好

須得垂楊相發輝

鳳闕輕遮翡翠帷
龍墀遙望麴塵絲
御溝春水柳暉映
狂殺長安年少兒

金谷園中鶯亂飛
銅駝陌上好風吹
城東桃李湏臾盡
爭似垂楊無限時

花萼樓前初種時
美人樓上鬪腰支
如今拋擲上一作長

街裏露葉如啼欲恨誰

煬帝行宮汴水濱
數珠殘柳不勝春
昨來風起花如雪

飛入宮牆不見人

御陌青門拂地垂千條金縷萬條絲如今綰作同心結
將贈行人知不知

城外春風滿酒旗行人揮袂日西時長安陌上無窮樹
唯有垂楊管別離

輕盈嫋娜占春華舞榭妝樓處處家春盡絮飛留不得
隨風好處落誰家

同前三首

劉禹錫

金史四庫全書
卷八十一
揚子江頭烟景迷
隋家宮樹拂金堤
嵯峨猶有當時色
丰蘓波中水鳥棲

迎得春光先到來
淺黃輕綠映樓臺
只緣嫋娜多情思
便被春風長請綏

巫峽巫山楊柳多
朝雲暮雨遠相和
因想陽臺無限事
為君迴唱竹枝歌

同前二首

李商隱

暫憑樽酒送無憀
莫損愁眉與細腰
人世死前唯有別

春風爭擬惜長條

含烟惹霧每依依萬緒千條拂落暉為報行人休盡折
半留相送半迎歸

同前

韓琮

梁苑隋堤事已空萬條猶舞舊春風那堪更想千年後
誰見楊花入漢宮

同前

施肩吾

傷見路傍楊柳春一枝折盡一重新今年還折去年處

不送去年離別人

同前八首

溫庭筠

宜春苑外最長條
閒裊春風伴舞腰
正是玉人腸斷處
一渠春水赤欄橋

南內牆東御路傍
預知春色柳絲黃
杏花未肯無情思
何事情人最斷腸

蘇小門前柳萬條
毵金線拂平橋
黃鶯不語東風起
深閉朱門伴細腰

金縷毵毵碧瓦溝六宮看黛惹春愁晚來更帶龍池雨
半拂欄杆半入樓

館娃宮外鄴城西遠映征帆近拂堤繫得王孫歸意切
不關春草綠萋萋

兩兩黃鸝色似金裊枝啼露動芳音春來幸自長如線
可惜牽纏蕩子心

御柳如絲映九重鳳凰牕柱繡芙蓉景陽樓伴千條露
一面新妝待曉鐘

織錦機邊鶯語頻停梭
垂淚一征人塞門三月猶蕭索
縱有垂楊未覺春

同前二首

皇甫松

春入行宮映翠微
玄宗侍女舞腰絲
如今柳向空城綠
玉笛何人更把吹

爛熳春歸水國時
吳王宮殿柳垂絲
黃鶯長叫空閨畔
西子無因更得知

同前四首

僧齊己

鳳樓高映綠陰陰凝碧多含雨露深莫謂一枝柔軟力
幾曾牽破別離心

館娃宮畔響廊前依託吳王養翠烟
劒去國亡臺榭毀却隨紅樹噪秋蟬

穠低似中陶潛酒軟極如傷宋玉風多謝將軍
遠營種翠中間卓戰旗紅

高僧愛惜遞江寺遊子傷殘露野橋
爭似著行塋上苑碧桃紅杏對搖搖

同前二首

張祐

莫折宮前楊柳枝
玄宗曾向笛中吹
傷心日暮烟霞起
無限春愁生翠睂

凝碧池邊斂翠睂
景陽樓下綰青絲
那勝妃子朝元閣
玉手和烟弄一枝

同前五首

孫魴

靈和風暖太昌春
舞線搖絲向昔人
何似曉來江雨後
一行如畫隔遙津

彭澤初栽五樹時只應閒看一枝枝不知天意風流處
要與佳人學畫眉

暖傍離亭靜拂橋入流穿檻綠搖搖不知落日誰相送
魂斷千條與萬條

春來綠樹遍天涯未見垂楊未可誇晴日萬株烟一陣
閒坊兼是莫愁家

十首當年有舊詞唱青歌翠幾無遺未曾得向行人道
不為離情莫折伊

同前十首

薛能

華清高樹出離宮
南陌柔條帶暖風
誰見輕陰是良夜
瀑泉聲畔月明中

洛橋晴影覆江船
羌笛秋聲溼塞烟
閒想習池公宴罷
水蒲風絮夕陽天

嫩綠輕懸似綴旒
路人遙見隔宮樓
誰能更近丹墀種
解播皇風入九州

暖風晴日斷浮埃
廢路新條發舊臺
處處輕輕可惆悵

後人攀處古人栽

潭上江邊嫋嫋垂日高風靜絮相隨青樓一樹無人見
正是女郎眠覺時

汴水高懸百萬條風清兩岸一時搖隋家力盡虛栽得
無限春風屬聖朝

和花烟樹九重城夾路春陰十萬營唯向邊頭不堪望
一株顚顚少人行

窗外齊垂旭日初樓邊輕好暖風徐遊人莫道栽無益

桃李清陰却不如

衆木猶寒獨早青
御溝橋畔曲江亭
陶家舊日應如此
一院春條綠遶廳

帳偃纓垂細復繁
令人心想石家園
風條月影皆堪重
何事侯門愛樹萱

同前九首

薛能

數首新詞帶恨成
柳絲傷我我傷情
柔娥幸有腰支穩
試踏吹聲作唱聲

高出軍營遠映橋賊兵曾斫火曾燒風流性在終難改
依舊春來萬萬條

縣依陶令想嫌迂營伴將軍即大廳此日與君除萬恨
數篇風調更應無

狂似纖腰軟勝綿自多情態更誰憐遊人不折還堪恨
拋向橋邊與路邊

朝陽晴照綠楊烟一別通波十七年應有舊枝無處覓
萬株風裏卓旌旃

晴垂芳態吐牙新
雨擺輕條溼面春
別有出牆高數尺
不知搖動是何人

暖梳簪朵事登樓
因挂垂楊立地愁
牽斷綠絲攀不得
半空懸著玉搔頭

西園高樹後庭根
處處尋芳有折痕
終憶舊遊桃葉舍
一株斜映竹籬門

劉白蘇臺總近時
當初章句是誰推
纖腰舞盡春楊柳
未有儂家一首詩

同前五首

牛嶠

解凍風來末上青
解垂羅袖拜卿卿
無端裊娜臨官路
舞送行人過一生

吳王宮裏色偏深
一簇纖條萬鏤金
不憤錢塘蘇小小
引郎枝下結同心

橋北橋南千萬條
恨伊張緒不相饒
金羈白馬臨風望

認得羊家

一作根

靜婉腰

狂雪隨風撲馬飛
惹烟無力被風欺
莫交移入靈和殿

宮女三千又妬伊

裊翠籠烟拂暖波舞裙新染麴塵羅
章華臺畔隋堤上
倚得春風爾許多

同前三首

和凝

軟碧搖烟似送人映花時把翠睂顰
青青自是風流主
漫貼金絲待洛神

瑟瑟羅裙金縷腰黛眉隈破未重描
醉來咬損新花子
拽住仙郎儘放嬌

鵲橋初就咽銀河今夜仙郎自性
和不是昔年攀桂樹
豈能月裏索姮娥

同前四首

孫光憲

閣門風暖落花乾飛遍江城雪不寒
獨有晚來臨水驛
閒人多凭赤闌干

有池有榭即濛濛浸潤翻成長養功
恰似有人長點檢
著行排立向春風

根柢雖然傍濁河無妨終日近笙歌
駉駉金帶誰堪比

還共黃鶯不較多

萬株枯槁怨亡隋似吊吳臺各自垂
好是淮陰明月裏
酒樓橫笛不勝吹

樂府詩集卷八十一

欽定四庫全書

樂府詩集卷八十二

宋 郭茂倩 輯

近代曲辭

浪淘沙九首

劉禹錫

九曲黃河萬里沙
浪淘風簸自天涯
如今直上銀河去
同到牽牛織女家

洛水橋邊春日斜
碧流輕淺見瓊沙
無端陌上狂風急

驚起鴛鴦出浪花

汴水東流虎眼文
清淮曉色鴨頭春
君看渡口淘沙處
渡卻人間多少人

鸚鵡洲頭浪颭沙
青樓春望日將斜
銜泥燕子爭歸舍
獨自狂夫不憶家

濯錦江邊兩岸花
春風吹浪正淘沙
女郎翦下鴛鴦錦
將向中流正晚霞

日照澄州江霧開
淘金女伴滿江隈
美人首飾侯王印

盡是沙中浪底來

八月濤聲吼地來頭高數丈觸山迴湏臾却入海門去
卷起沙堆似雪堆

莫道讒言如浪深莫言遷客似沙沉千淘萬漉雖辛苦
吹盡狂沙始到金

流水淘沙不暫停前波未滅後波生令人忽憶瀟湘渚
迴唱迎神三兩聲

同前六首

白居易

一泊沙來一泊去一重浪滅一重生相覺相淘無歇日
會交山海一時平

白浪茫茫與海連平沙浩浩四無邊暮去朝來淘不住
遂令東海變桑田

青草湖中萬里程黃梅雨裏一行人愁見灘頭夜泊處
風翻暗浪打船聲

借問江湖與海水何似君情與妾心相恨不如潮有信
相思始覺海非深

海底飛塵終有日
山頭化石豈無時
誰道小郎拋小婦
船頭一去沒迴期

隨波逐浪到天涯
遷客生還有幾家
卻到帝鄉重富貴
請君莫忘浪淘沙

同前二首

皇甫松

灘頭細草接疎林
浪惡曾船半欲沉
宿鷺眠洲非舊浦
去年沙觜是江心

蠻歌苴寇北人愁
松雨蒲風野艇秋
浪起鷓鴣眠不得

塞沙細細入江流

紇那曲二首

劉禹錫

楊柳鬱青青竹枝無限情
同郎一回顧聽唱紇那聲
踏曲興無窮調同詞不同
願郎千萬壽長作王人翁

瀟湘神二曲

劉禹錫

湘水流湘水流九疑雲物至今愁
君問二妃何處所零陵香草露中秋

斑竹枝斑竹枝淚痕點點寄相思
楚客欲聽瑤瑟怨瀟

湘深夜月明時

拋毬樂二首

劉禹錫

五綵繡團團登君玳瑁筵最宜紅燭下偏稱落花前上
客如先起應須贈一船

春早見花枝朝朝恨發遲及看花落後卻憶未開時幸
有拋毬樂一杯君莫辭

太平樂二首

白居易

樂苑曰太平樂商調曲也

歲豐仍節儉時泰更銷兵聖念長如此何憂不太平
湛露浮堯酒薰風起舜歌願同堯舜意所樂在人和

同前二首

王維

風俗今和厚君王在穆清行看採花曲盡是太階平
聖德超千古皇威靜四方蒼生今息戰無事覺時長

昇平樂十首

薛能

唐會要曰昇平樂商調曲也

正氣遶宮樓皇居信上游遠岡延聖祚平地載神州會

合皆重譯潺湲近八流中興豈假問據此自千秋

寥泝敞延英朝班立位橫宣傳無草動拜舞有衣聲駕
瓦雲消溼蟲絲日照明辛勤自不到遙見似前生

處處足歡聲時康歲已深不同三尺劍應似五絃琴壽
笑山猶盡明嫌日有陰何當憐一物亦遣斷愁吟

曙質絕埃氛彤庭列禁軍聖顏初對日龍尾競緣雲珮
響交成韻簾陰暖帶紋逍遙豈有事於此詠南薰

一物周天至

一作至
周天

沃纖盡宴然車書無異俗甲子並

豐年奇技皆歸朴征夫亦服田君王故不有台鼎合章

弦一作賢

日日聽歌謠區中盡祝堯蟲蝗初不害夷狄近全銷史
筆唯書瑞天臺絕見祆因令匹夫志轉欲事清朝

品物盡昭蘇神功復帝謨他時應有壽當代且無虞賜
歷通遐俗移關入半胡鷦鷯一何幸於此寄微軀

無戰復無私堯時即此時焚香臨極早待月卷簾遲端
拱乾坤內何言駐續坐君看聖明驗只此是神龜

旭日上清穹明堂坐聖聰衣裳承瑞氣冠冕蓋重瞳花
木經宵露旌旗立仗風何期於此地見說似一作是仙宮
五帝三皇主蕭曹魏邴臣文章惟反朴戈甲盡生塵諫
紙應無用朝綱自有倫昇平不可紀所見是閒人

金縷衣

李錡

勸君莫惜金縷衣勸君惜取少年時花開堪折直須折
莫待無花空折枝

鳳歸雲二首

滕潛

金井欄邊見羽儀
梧桐樹上宿寒枝
五陵公子憐文綵
畫與佳人刺繡衣

飲啄蓬山最上頭
和烟飛下禁城秋
曾將弄玉歸雲去
金翹斜開十二樓

拜新月

李端

開簾見新月便即下階拜
細語人不聞北風吹裙帶

同前

吉中孚妻張氏

拜新月拜月出堂前
暗魄深籠桂虛弓未引弦
拜新月

拜月妝樓上驚鏡未安臺蛾眉已相向拜新月拜月不
勝情庭前風露清月臨人自老望月更長生東家阿母
亦拜月一拜一悲聲斷絕昔年拜月逞容儀如今拜月
雙淚垂回看衆女拜新月卻憶紅閨年少時

憶江南三首

白居易

一曰望江南樂府雜錄曰望江南本名謝
秋娘李德裕鎮浙西為妾謝秋娘所製後
改為望江南

江南好風景舊曾諳日出江花紅勝火春來江水綠如藍能不憶江南

江南憶最憶是杭州山寺月中尋桂子郡亭枕上看潮頭何日更重遊

江南憶其次憶吳宮吳酒一杯春竹葉吳娃雙舞醉芙蓉早晚復相逢

同前二首

劉禹錫

春過也其惜豔陽年猶有桃花流水上無辭竹葉醉樽

前惟待見青天

春去也多謝洛城人
弱柳從風疑舉袂
叢蘭裊露似雪
巾獨笑亦含顰

宮中調笑四首

王建

樂苑曰調笑商調曲也戴叔倫謂之轉應
詞

團扇團扇美人病來遮面
玉顏憔悴三年誰復商量管
弦
管弦管弦管春草昭陽路斷

胡蝶胡蝶飛上金花枝葉君前對舞春風百葉桃花樹
紅紅樹紅樹鶯語鶯啼日暮

羅袖羅袖暗舞春風舊遊遙看歌舞玉樓好日新妝坐
愁愁坐愁坐一世虛生虛過

楊柳楊柳日暮白沙渡口船頭江水茫茫商人少婦斷
腸腸斷腸斷鷓鴣夜飛失伴

同前二首

韋應物

胡馬胡馬遠放燕支山下咆沙咆雪獨嘶東望西望路

迷迷路迷路邊草無窮日暮

河漢河漢曉挂秋城漫漫愁人起望相思江南塞北別
離離別離別河漢雖同路絕

轉應詞

戴叔倫

邊草邊草邊草盡來兵老山南山北雪晴千里萬里月
明明月明月胡笳一聲愁絕

宮中行樂詞八首

李白

小小生金屋盈盈在紫微山花插寶髻石竹繡羅衣每

出深宮裏常隨步輦歸只愁歌舞散

一作罷

化作綵雲飛

柳色黃金嫩梨花白雪香玉樓巢

一作關

翡翠金

一作珠

殿

鎖鴛鴦逗妓隨雕

一作朝

輦徵歌出洞房宮中誰第一飛

燕在昭陽

盧橘為秦樹蒲萄出

一作是

漢宮烟花宜落日絲管醉春

風笛奏龍鳴水簫吟鳳下空君王多樂事何必向回中

玉樹

一作殿

春歸日

一作好

金宮樂事多後庭朝未入輕輦

夜相過笑出花間語嬌來燭下歌莫教

一作隨

明月去留

著醉姮娥

繡戶香風暖
紗窗曙色新
宮花爭笑日
池草暗生春
綠樹聞歌鳥
青樓見舞人
昭陽桃李月
羅綺自一作生相親

今日明光裏
還須結伴遊
春風開紫殿
天樂下珠樓
豔舞全知巧
嬌歌半欲羞
更憐花月夜
宮女笑藏鉤

寒雪梅中盡
春風柳上歸
宮鶯嬌欲醉
簷鶯語還飛
遲日明歌席
新花豔舞衣
晚來移綵仗
行樂泥光輝
水綠南薰殿
花紅北闕樓
鶯歌聞太液
鳳吹遶瀛洲
素

女鳴珠佩天人弄綵毬今朝風日好宜入未央遊

宮中樂五首

令狐楚

楚塞金陵靜巴山玉壘空萬方無一事端拱大明宮
霜霽長楊苑冰開太液池宮中行樂日天下盛明時
柳色烟相似梨花雪不如春風真有意一一麗皇居
月上宮花靜烟含苑樹深銀臺門已閉仙漏夜沉沉
九重青鎖闥百尺碧雲樓明月秋風起珠簾上玉鉤

同前五首

張仲素

網戶交如綺紗窗薄似烟樂吹天下曲人是月中仙
翠匣開寒鏡珠釵挂步搖妝成祇畏曉更漏促春宵
江果瑤池實金盤露井冰甘泉將避暑臺殿曉光凝
月彩浮鸞殿砧聲隔鳳樓笙歌臨水檻紅燭乍迎秋
奇樹畱寒翠神池結夕波黃山一夜雪渭水雁聲多

踏歌詞二首

崔液

綵女迎金屋仙姬出畫堂鴛鴦裁錦袖翡翠帖花黃歌
響舞分行艷色動流光

庭際花微落樓前漢已橫金臺催夜盡羅袖拂寒輕樂
笑暢歡情未半著天明

同前三首

謝偃

春景嬌春臺新露泣新梅春葉參差吐新花重疊開花
影飛鶯去歌聲度鳥來倩看飄飄雪何如舞袖迴
逶迤度香閣顧步出蘭閨欲曉鴛鴦殿先過桃李蹊風
帶舒還卷簷花舉復低欲問今宵樂但聽歌聲齊

夜久星沉沒更深月影斜裙輕纔動佩鬟薄不勝花細

風吹寶袂輕露溼紅紗相看樂未已蘭燈照九華

同前二首

張說

花萼樓前雨露新長安城裏太平人龍銜火樹千燈艷

雞踏

一作上

蓮花萬歲春

帝宮三五戲春臺行雨流風莫妒來西域燈輪千影合
東華金闕萬重開

踏歌行四首

劉禹錫

春江月出大堤平堤上女郎連袂行唱盡新詞看

一作散

不見紅霞影樹鴈鳴

桃蹊柳陌好經過燈下妝成月下歌為是襄王故宮地
至今猶自細腰多

新詞宛轉遞相傳振袖傾鬟風露前月落烏啼雲雨散
遊童陌上拾花鈿

日暮江頭聞竹枝南人行樂北人悲自從雪裏唱新曲
直至三春花盡時

天地長久詞五首

盧綸

天地長久詞盧綸所作也其和云天地久

萬年昌

玉砌紅花樹香風不敢吹春光解天意偏發殿南枝
虹橋千步廊半在水中央天子方清暑宮人重暮妝
辭輦復當熊傾心奉上宮君王若看貌甘在衆妃中
雲日呈祥禮物殊北庭生獻五單于塞天萬里無飛鳥
可在邊城用郅都

臺殿雲涼風日微君王初賜六宮衣樓船罷泛歸猶早

金史卷八十二
行道才人鬪射飛

欸乃曲五首

元結

欸乃曲元結之所作也其序曲曰大歷初
結為道州刺史以軍事詣都使還州逢春
水舟行不進作欸乃曲令舟子唱之以取
適於道路云欸音襖乃音靄棹船聲也

偏存名跡在人間順俗與時未安閒坐謁大官兼問政
扁舟卻入九疑山

湘江二月春水平滿月和風宜夜行
唱橈欲過平陽戍
守吏相呼問姓名

千里楓林烟雨深無朝無暮有猿吟
停橈靜聽曲中意
好是雲山韶濩音

零陵郡北湘水東
浯溪形勝滿湘中
溪口石顛堪自逸
誰能相伴作漁翁

下瀧船似入深淵
上瀧船似欲昇天
瀧南始到九疑郡
應絕高人乘興船

十二月樂辭十三首

李賀

正月

上樓迎春新春歸

一作正月上樓迎春歸

暗黃著柳宮漏遲薄薄

淡靄弄野姿寒綠幽泥生短絲
錦牀曉卧玉肌冷露臉未開
對朝暝官街柳帶不堪折
早晚菖蒲勝綰結

二月

二月飲酒採桑津宜男草生蘭笑人
蒲如交劍

一作剪刀風

如薰勞勞胡鶯怨酣春薇帳逗烟生
綠塵

一作看綠塵

金翅

蛾髻愁暮雲香颿起舞真珠裙津頭送別唱流水酒客
背寒南山死

三月

東方風來滿眼春花城柳暗

一作禁

愁幾

一作殺

人複宮深

殿竹風起新翠舞襟靜如水光風轉蕙百餘里暖霧驅
雲撲天地軍裝宮妓掃蛾淺搖搖錦旗夾城暖曲水飄
香去不歸梨花落盡成秋

一作愁苑

四月

曉涼暮涼樹如蓋千山濃綠生雲外
依微香雨青氛氲

一作過
青氛

膩葉蟠花照曲門
金塘閒水搖碧漪
老景沉重

一作
帖無驚飛墮紅殘萼
暗參差

五月

雕玉押簾上

一作雕玉
簾押上

輕縠籠虛門
井汲鉛華水
扇織

鴛鴦文回雪
舞涼殿
甘露洗空綠
羅袖從徊翔

一作羅
綬從風

翔香汗霑寶粟

六月

裁生羅伐湘竹帔

一本無帔字

拂疎霜簟秋玉炎炎紅鏡東

方開暈如車輪上徘徊嗷嗷赤帝騎龍來

七月

星依雲渚冷露滴盤中圓好花生木末衰蕙愁空

一作故

園夜天如玉砌池葉極青錢僅厭舞衫薄稍知花簟寒
曉風何拂拂北斗光闌干

八月

嬭

一作宮

妾怨長夜獨客夢歸家倚簷蟲緝

一作織

絲向壁

燈垂花簷外月光吐簾中樹影斜悠悠飛露姿點綴池
中荷

九月

離宮散螢天似水竹黃池冷芙蓉死月綴金鋪光脉脉
涼苑虛庭空澹白霜花飛飛風草草翠錦欄斑滿層道
雞人罷唱曉曉聽鴉啼金井下疎桐

十月

玉壺銀箭稍難傾缸花夜笑凝幽明碎霜斜舞上羅幕

燭籠兩行照飛閣珠帷怨卧不成眠金鳳刺衣著體寒
長看對月關營環

十一月

宮城圍回凜嚴光白天碎碎墮瓊芳撾鍾高飲千日酒
卻天凝寒作君壽御溝泉合一作冰合如環素火井溫水在
何處

十二月

月脚淡光紅灑灑薄霜不銷桂枝下依稀和氣解冬嚴

已就長日辭長夜

閏月

帝重光年重時七十二候回環推天官玉琯灰剝飛今
歲何長來歲遲玉母移桃獻天子羲氏和氏迂龍轡

樂府詩集卷八十二

欽定四庫全書

樂府詩集卷八十三

宋 郭茂倩 輯

雜歌謠辭

言者心之聲也歌者聲之文也情動於中而形
於言言之不足故嗟歎之嗟歎之不足故永歌
之歌之為言也長言之也夫欲上如抗下如墜
曲如折止如槁木倨中矩句中鉤纍纍乎端如

貫珠此歌之善也宋書樂志曰黃帝帝堯之世
王化下洽民樂無事故因擊壤之歡慶雲之瑞
民因以作歌其後風衰雅缺而妖淫靡曼之聲
起周衰有秦青者善謳而薛談學謳於秦青未
窮青之伎而辭歸青餞之於郊乃撫節悲歌聲
震林木響遏行雲薛談遂留不去以卒其業又
有韓娥者東之齊至雍門匱糧乃鬻歌假食既
去而餘響繞梁三日不絕左右謂其人不
去也

過逆旅逆旅人辱之韓娥因曼聲哀哭一里老
幼悲愁垂涕相對三日不食遽追之韓娥還復
為曼聲長歌一里老幼喜躍忭舞不能自禁忌
向之悲也乃厚賂遣之故雍門之人善歌哭效
韓娥之遺聲衛人王豹處淇川善謳河西之民
皆化之齊人繇駒居高唐善歌齊之右地亦傳
其業前漢有魯人虞公者善歌能令梁上塵起
若斯之類並徒歌也爾雅曰徒歌謂之謠廣雅

曰聲比於琴瑟曰歌韓詩章句曰有章曲曰歌

無章曲曰謠梁元章

一作帝

纂要曰齊歌曰謳吳

歌曰歛楚歌曰豔浮歌曰哇振旅而歌曰凱歌

堂上奏樂而歌曰登歌亦曰升歌故歌曲有陽

陵白露朝日魚麗白水白雪江南陽春淮南駕

辯涼水陽阿采菱下里巴人又有長歌短歌雅

歌緩歌浩歌放歌怨歌勞歌等行漢世有相和

歌本出於街陌謳謠而吳歌雜曲始亦徒歌復

有但歌四曲亦出自漢世無弦節作伎最先一人唱三人和魏武帝尤好之時有宋容華者清徹好聲善唱此曲當時特妙自晉已後不復傳遂絕凡歌有因地而作者京兆邯鄲歌之類是也有因人而作者孺子才人歌之類是也有傷時而作者微子麥秀歌之類是也有寓意而作者張衡同聲歌之類是也甯戚以困而歌項籍以窮而歌屈原以愁而歌卞和以怨而歌雖所

遇不同至於發乎其情則一也歷世以來歌謳
雜出今並採錄且以謠識繫其末云

歌辭

擊壤歌

帝王世紀曰帝堯之世天下大和百姓無事有
八九十老人擊壤而歌

日出而作日入而息鑿井而飲耕田而食帝何力於我哉

卿雲歌三首

尚書大傳曰舜將禪禹於時俊乂百工相和而歌卿雲帝乃唱之曰卿雲爛兮八伯咸進稽首曰明明上天帝乃再歌曰日月有常史記天官書曰若烟非烟若雲非雲郁郁紛紛蕭索輪囷是謂慶雲慶雲即卿雲蓋和氣也舜時有之故美之而作歌

卿雲爛兮糾縵縵兮日月光華旦復旦兮
明明上天爛然星陳日月光華弘于一人

日月有常星辰有行四時順經萬姓允誠於予論樂配天之
靈遷于賢善莫不咸聽襲乎鼓之軒乎舞之精華已竭褰裳
去之

塗山歌

吳越春秋曰禹年三十未娶行塗山恐時算失
嗣辭云吾之娶也必有應也乃有白狐九尾造
於禹禹曰白者吾之服也九尾者王之證也於
是塗山之人歌之禹因娶塗山謂之女嬌

綏綏白狐九尾龐龐我家嘉夷來賓來王成于家室我都攸
昌天人之際於茲則行明矣哉

夏人歌二首

尚書大傳曰夏人飲酒醉者持不醉者不醉者
持醉者而歌曰盍歸乎薄薄亦大矣伊尹退而
更曰覺兮較兮吾大命格兮去不善而善何不
樂兮薄湯之都言當歸湯也韓詩外傳曰樂為
酒池糟隄縱靡靡之樂一鼓而牛飲者三千羣

臣皆相持而歌

江水沛兮舟楫敗兮我王廢兮趣歸于亳亳亦大兮

樂兮樂兮四牡驕兮六轡沃兮去不善而從善何不樂兮

商歌二首

甯戚

淮南子曰甯越欲干齊桓公困窮無以自達於是
為商旅將任車以商於齊算宿於郭門外桓公郊
迎客夜開門辟任車爝火甚盛從者甚衆越飯
牛車下望見桓公而悲擊牛角而疾商歌桓公

聞之曰異哉非常人也命後車載之越一作戚
南山斫白石爛生不遭堯與舜禪短布單衣適至胥從辱
飯牛薄夜半長夜漫漫何時旦

滄浪之水白石梁中有鯉魚長尺半弊布單衣裁至胥清
朝飯牛至夜半黃犢上坂且休息吾將捨汝相齊國

師乙歌

孔子

家語曰孔子相魯齊人歸女樂魯君淫荒孔
子遂行師乙送孔子曰吾欲歌可乎乃歌之

彼婦人之口可以出走彼婦人之謁可以死敗優哉游哉
聊以卒歲

獲麟歌

孔子

孔叢子曰叔孫氏之車子鉏商樵於野而獲
麟焉衆莫之識以為不祥棄之五父之衢冉
有告曰麋身而肉角豈天之妖乎夫子曰吾
將往觀焉遂泣曰予之於人猶麟也麟仁獸
出而死吾道窮矣乃歌云

唐虞世兮麟鳳游
今非其時來何求
麟兮麟兮我心憂

河激歌

趙簡子夫人

列女傳曰女娟者趙河津吏之女也簡子
南擊楚津吏醉卧不能渡簡子簡子怒召
欲殺之娟懼持楫走前曰願以微軀易父
之死簡子遂釋不誅將渡用楫者少一人
娟壞拳操楫而請簡子遂與渡中流為簡
子發河激之歌簡子歸納為夫人

升彼河兮而觀清水揚波兮冒冥冥禱求福兮醉不醒
誅將加兮妾心驚罰既釋兮瀆乃清妾持楫兮操其維
蛟龍助兮主將歸呼來權兮行勿疑

越人歌

劉向說苑曰鄂君子皙泛舟於新波之中
乘青翰之舟張翠蓋會鍾鼓之音畢榜枻
越人擁楫而歌於是鄂君乃榆脩袂行而
擁之舉繡被而覆之鄂君楚王母弟也

今夕何夕兮塞州中流今日何日兮得與王子同舟蒙
羞被好兮不訾詬恥心幾頑而不絕兮得知王子山有
木兮木有枝心說君兮知不知

徐人歌

劉向新序曰延陵季子將聘晉帶寶劍以
過徐君徐君觀劍不言而色欲之季子未
獻也然其心許之矣使反而徐君已死季
子於是以劍帶徐君墓樹而去徐人乃為

之歌

延陵季子兮不忘故脫千金之劍兮帶丘墓

漁父歌

古辭

楚辭曰屈原既放游於江潭漁父見之鼓
枻而歌滄浪水名也清諭明時可以振纓
而仕濁諭亂世可以抗足而去故孔子曰
清斯濯纓濁斯濯足矣言自取之也若張
志和漁父歌但歌漁者之事

滄海之水清兮可以濯足
縵滄浪之水濁兮可以濯吾足

漁父歌五首

張志和

西塞山邊白鷺飛
桃花流水鰕魚肥
青箬笠綠蓑衣
春

江一作斜風細雨不須歸

釣臺漁父褐為裘
兩兩三三舴艋舟
能縱棹慣乘流
長江白浪不曾憂

雪溪灣裏釣漁翁
舴艋為家西復東
江上雪浦邊風笑

著荷衣不歎窮

松江蟹舍主人歡
菰飯莼羹亦美餐
楓葉落荻花乾
醉宿漁舟不覺寒

青草湖中月正圓
巴陵漁父棹歌連
釣車子
搥頭船
樂在風波不用仙

同前

和凝

白芷汀寒立鷺鷥
蘋風輕翦浪花時
烟幕幕日遲遲
香引芙蓉惹釣絲

同前

歐陽炯

風浩寒溪照膽明
小君山上玉蟾生
荷露墜翠烟輕撥
刺遊魚幾處驚

同前三首

李珣

水接衡門十里餘
信船歸去卧看書
輕爵祿慕玄虛莫
道漁人只為魚

避世垂綸不記年
官高爭得似君閒
傾白酒對青山笑
指柴門待月還

棹警鷗飛水濺袍影侵潭面柳垂條終日醉絕塵勞曾
見錢塘八月濤

採葛婦歌

吳越春秋曰采葛越之婦人傷越王用心
乃作若何之歌

嘗膽不苦味若飴令我采葛以作絲

紫玉歌

樂府詩集曰紫玉吳王夫差女也作歌詩

以與韓重

南山有鳥北山張羅意欲從君讒言孔多悲結成疹沒
命黃墟命之不造寃如之何羽族之長名為鳳凰一日
失雄三年感傷雖有衆鳥不為匹雙故見鄙姿逢君輝
光身遠心近何曾暫忘

鄴民歌

史記曰魏襄王時史起為鄴令引漳水溉
鄴以富魏之河內而民作歌云

鄴有賢令兮為史公決漳水兮灌鄴旁終古烏鹵兮生
稻梁

鄭白渠歌

史記曰韓聞秦之好興事欲罷無令東伐
廼使水工鄭國間說秦令鑿涇水自中山
西抵軹口為渠並北山東注洛溉烏鹵之
地四萬餘頃今曰鄭國渠漢書曰太始二
年趙中大夫白公復奏穿渠引涇水首起

谷口尾入櫟陽注謂中袤二百里溉田四
千五百餘頃名曰白渠人得其饒於是歌
之

田於何所池陽谷口鄭國在前白渠起後舉由如雲決
渠為雨涇水一石其泥數斗且溉且糞長我禾黍衣食
京師億萬之口

百里奚歌

高允生

羈旅入秦庭始得收顯曜釋褐出輜車卓為千乘道豔

色進華容繁弦發微調居貴易素心翻然忘久要裝金
五羊皮寫情陳所告豈徒望自傷念君無定操

秦始皇歌

古今樂錄曰秦始皇祠洛水有黑頭公從
河中出呼始皇曰來受天寶乃與羣臣作
歌

洛陽之水其色蒼蒼祠祭大澤倏忽南臨洛濱醊禱色
連三光

雞鳴歌

樂府廣題曰漢有雞鳴衛士主雞唱宮外
舊儀宮中與臺並不得畜雞晝漏盡夜漏
起中黃門持五夜甲夜畢傳乙乙夜畢傳
丙丙夜畢傳丁丁夜畢傳戊戊夜是為五
更未明三刻雞鳴衛士起唱漢書曰高祖
圍項羽垓下羽是夜聞漢軍四面皆楚歌
應劭曰楚歌者雞鳴歌也晉太康地記曰

後漢固始鮦陽公安細陽四縣衛士習此
曲於闕下歌之今雞鳴歌是也然則此歌
蓋漢歌也按周禮雞人掌大祭祀夜嘑旦
以詔百官則所起亦遠矣

東方欲明星爛爛汝南晨雞登壇喚曲終漏盡嚴具陳
月沒星稀天下旦千門萬戶遞魚鑰宮中城上飛烏鵲

雞鳴曲

王建

雞初鳴明星照東屋雞再鳴紅霞生海腹百官待漏雙

闕前聖人亦挂山龍服寶釵命婦燈下起環珮玲瓏曉
光裏直內初燒玉按香司更尚滴銅壺水金吾衛裏直
更一作郎妻到明不睡聽晨雞天頭日月相送近夜棲旦
鳴人不迷

同前

李 廓

星稀月没上五更膠膠角角雞初鳴征人牽馬出門立
辭妾欲向安西行再鳴引頸簷頭下月中角聲催上馬
纔分地色第三鳴旌旗一作旆紅塵已出城婦人上城亂

招手夫壻不聞送哭聲長恨雞鳴別時苦不遣雞栖近
窗戶

平城歌

漢書匈奴傳曰高祖自將兵三十二萬擊
韓王信帝先至平城步兵未盡到冒頓縱
精兵三十餘萬圍帝於白登七日漢兵中
外不得救餉契噲時為上將軍不能解圍
天下皆歌之後用陳平祕計得免白登在

平城東南去平城十餘里

平城之下亦誠苦七日不食不能穀弩

楚歌

漢高帝

漢書曰高祖欲立戚夫人子趙王如意而廢太子後不果戚夫人泣涕帝曰為我楚舞吾為若楚歌其意言太子得四皓為輔羽翼成就不可易也顏師古曰楚歌者楚人之歌猶吳歎越吟也

鴻鵠高飛一舉千里羽翼以

一作已

就橫絕四海橫絕四

海又可奈何雖有繒繳尚

一作將

安所施

吳楚歌

傅玄


樂府詩集曰傅元辭一曰燕美人歌

燕人美兮趙女佳其室則邇兮限曾崖雲為車兮風為馬玉在山兮蘭在野雲無期兮風有止思心多端誰能理

同前

張籍

庭前春鳥啄林聲紅夾羅襦縫未成今朝社日停針線
起向朱櫻樹下行



樂府詩集卷八十三